

«Uman, ti es terra e daventas terra»

RTR/FMR

En Svizra datti duas variantas da sepulir: ins po sa laschar cremar u sutterrar. I dat dentant anc ina terza opziun pli ecologica: la cumpostaziun funerala.

Insacura sa tschenta la dumonda: Tge duai capitar cun mes corp suenter mia mort? En Svizra datti duas respostas a questa dumonda: cremar u sutterrar. 10 % da la populaziun sa decida ozendi per ina sutterrada, 90 % per ina cremaziun. In'otra opziun n'exista actualmain betg en Svizra. Omaduas metodos pratigadas han però effects negativs sin

l'ambient: Entras chemicalias e materials betg decumponibels po la sutterrada donnegiar il terren e las auas e la cremaziun dovra blera energia e lascha enavos rument spezial.

Ina terza opziun

En Svizra s'engaschan duas uniuns per ch'ina terza opziun daventia legala: la cumpostaziun funerala. L'emissiun La Marella dad RTR è s'inscuntrada cun duas dunnas da quellas duas uniuns. Lina Hänni, scienziada da l'ambient e fundatura da l'uniun «Werde Erde» di: «La natira ans mussa gia tut. Nagin organissem na resta intact suenter sia mort. El vegn dissolvì en pitschnas particlas per lura puspè entrar en il ciclus da la natira.»

I dat diversas uniuns europeicas che s'engaschan per la legalisaziun da la cumpostaziun funerala. In problem è dentant la mancanza da datas scientificas da preschentar a la politica. Perquai èn las egliadas per il mument drizzadas vers la Svizra, nua ch'il SHIFT (Swiss Human Institute of Forensic Taphonomy) ha gist lantschà in project da perscrutaziun che vegn a durar ils proxims quatter onns. Igl è l'emprima giada che era l'uschenunada humusaziun vegn realisada cun corps dad umans. «In di hai jau realisà che jau na veglia ni vegnir sutterrada ni cremada. Uschia hai jau tschertgà in'alternativa», raquinta Sarah Joliat, sepulidra e presidenta da l'uniun «Humusation Suisse».

Duas metodos cun il medem resultat final

Sch'ins discorra da cumpostaziun funerala manegi'ins ozendi ina da questas duas metodos pli effizientas ed ecologicas, numnadain la humusaziun e la terramaziun. Tar la humusaziun ha il process lieu or en il liber e dura circa in onn. I dovra persunal per controllar ch'il protocol vegnia respectà (p.ex. che l'umiditad constettia) e pouca infrastruttura. La humusaziun pudess avair lieu en ina partiziun deditgada d'in santeri. Ella na vegn fin uss anc betg pratigada cun umans. La terramaziun percenter ha lieu en in vaschè serrà. La procedura dura tranter in e trais mais. I dovra tecnica e persunal per controllar e giustar parameters, sco la temperatura, l'umiditad, l'oxigen. Ella dovra infrastruttura, energia ed in lieu centralisà, p.ex. ina halla industrialia. En ils Stadis Unids datti gia firmas che porschan questa procedura. En la Germania datti en pli in project da pilot lantschà il 2022.

L'emissiun La Marella cun il titel «Uman, ti es terra e daventas terra» dals 7 da favrer 2026 è da chattar sin www.rtr.ch.



Uschia pudess la terramaziun vesair ora en Svizra en il futur.

Foto MAD/Recompose



Sarah Joliat è sepulidra e presidenta da l'uniun «Humusation Suisse». Foto MAD/Humusation Suisse



Lina Hänni è fundatura da l'uniun «Werde Erde».

Foto MAD/Werde Erde